

# Pablotenipa Corintodenidsa ima teppe dsotodecca dosse quinajaro

## 2 Corintios

Pablopa tahide odsa panani Corintohuaji toccapohuipa nahidsa huajano pamaha madijari. Dsotode naco nahihuaji Jesocristodsa toquejenajarideni qquide toccapomajari. Pohuadenidsa ima teppe dsodode naco dissera tajari, Dio Pohua jipa tahicca tocahatterahijine.

Pocca ima teppe tahideccadsa: 1 Corintodenidsa, inajaro. Dsotode pocca ima teppe pohuadenidsa dsodo inapomajaro. Naraha najaro ima teppepi iadsa toja-jerani. Amossi nani. Najaro nattini ima teppe onihi dsodo inapomajaropi ajijaro. Ajaropi dsotodemaniccaraha ajarodsa: Corintodenidsa ima teppe dsotodecca, inajaro.

Ajjaro ima teppepi Pablo pohuadsa tojiperamanajari quinahi mittadsa pohuadenidsa dsodo inapomajaro. Aja pohuadeni quequeriquimana nahihuaji maidsehe mamaridedeni jai tojedsimajari. –Pablopa Diocca dosseniji jarahi, pocca marinaja timittamana-jeraji –quinadsapa Pablodsa tojiperamanajari.

Nadsapa Pablo pohuadsa Dio pajissa huahua najaricca ima, Jesocristo tahimari mari mari najarijine ocasserani ahuaridsajaricca ima dsodo inajaro. Pohuadenidsa huati huana tadsa pocca marinaja bicani onihi onihi dsodo inajaro.

---

### Pablo, Timoteo tedseje nija quinajari

**1** <sup>1</sup>¿Nija, ohuemecotedeni? Ohuapi Pablo. Tiadenidsa dsodo onajaro. Dio jipa tadsa Jesocristocca dodosse ojajaro. Ohuemecote Timoteo tedseje tiadenidsa: –¿Nija, bicaquiquiri tiquinaqui? –inajaro. Ajijaro imapi nani dsama arobeni Acaiacca odsa panani Corintohuajicca Dio Attidsa titiqueriquimana najarodenidsa dsodo inajaro. Najaro ticcadeni dsama

arobenidsa Jesocristodsa jehe quinajari madiridsamanajaridendsa naqui dsodo inajaro. <sup>2</sup> Icca Abi Dio, Pohua Bedi ia Medsede Jesocristo tedseje tiadenidsa ima bicani inanamana-dsanapona, inajaro. Poccadeni jonehe naqui tibodidendsa tojadsanapona, inajaro.

### Diopa ia acco tocamabaqqi tahi

<sup>3</sup> Ia Medsede Jesocristocca Abi Diodsa etidsena. Pohuapa icca Abi iadsa huati cahanari canahi.

Huajjiradsa ia acco acco totocamabaqqui najari. <sup>4</sup>Ocasserehe onihi, onihi iadsa ssonaridsapi Dio ibodi acco camajari. Nadsapi imecotedeni ocasserani ahuamanadsa naco acco icamabaqquihijine ipajirani. Pina Dio ia acco tocamabaqquijarissa najaro imecotedeni acco icamabaqquijari. <sup>5</sup>Jesocristopa ocasserehe huapi tehe inahanajaro. Nadsapi ia naqui pina Cristo pohua ocasserani ahuajarissa inajaro. Ocasserehe inahanani huapi taraha Jesocristocca iquejenarojine Diodca acco camehe iadsa jiquejerani. <sup>6</sup>Aji ia ocasserehe inahanaropi ponima jerani. Tibodideni acco icamabaquiniijine, tossiejehe ticajimananijine ocasserehe ihinahana najarode. Dio ibodi acco camadsapa ia naqui tibodideni acco icamabaqquijaro. Nema nadsapi ocasserehe pina iadsa ssonarijaro-ssa najaro tiadenidsa ssonaridsapi mohuaradsa tinahanamananijine tipajiramananitohui. <sup>7</sup>Nadsama ocasserehe tinahanamanajaro pina ocasserehe inahanajarossa nadsapi Dio tiadeni acco tocamabaqquihitohui. Pina ia acco tocamabaqquijarissa nahitohui. Najaro pajissa tojanijine nahatoto inajaro.

<sup>8</sup>Imecotedeni, dsama Asiahuaji jaijadsa ocasserani imeni inahanajarocca ima nahatoquiri tiquinanijine tiadenidsa dsodo onajaro. Najidsohue oppinabote iadsa ssonaridsapi ipamajonabote nade. Iadsa tocasserani nadsapi: –Nidsa ajijaro najidsohue jicadsapi imadipomanitohui –inejerade. <sup>9</sup>Ibodidsa: –Pajissa ipamajonanitohui –inade. Naraha ipamajonanijine Dio ecossadsapi imadicajaro. Nadsapi

najaro oppinehejine iadsa ahuato tajaro: Madija iapi ia inassiajanijine ipajira-jerani. Diona nahato tahi ojari najari. Pohuapa huatijarideni nahatonide. <sup>10</sup>Pohuapa dsoqqehe oppinabotedsa ia dsori tonanabaqquijari. Pohuadsa pajissa inadsapi nidsa dsotode paji idsoqquerinicca najidsohuedsa naco ia dsori tonanabaqquihitohui. Nadsapi etti: –Jehe, ia dsori tonanabaqqui-dsanapohuitohui –ihinanajaro. <sup>11</sup>Tiadeni naqui ia acco ticamabaquimananijine Diodsa huati huati tiquinaji. Diodsa huatide huapi tadsapa Pohuadsa huatidsemanahi naco huapi tahitohui. Diopa ima bicani iadsa inananicca ima imecotedeni mitta-manadsapa Pohuadsa: –Epejeni, tijine bica tani –quinahitohui.

**Pablopa Corintohuaji  
toccani-jarajaricca ima**

<sup>12</sup>Ohuemecotedeni, tiadenidsa imadidsapi imadinissa tade. Najarodsa etidsejaro. Ima icappirehe imadijaro. Etti naqui maidsehe jirehe huati huati inajaro. Madija huapimadsa naqui bicaquiri inadsa nema inaridsajaro. Naraha icca madie bica tajaropi ibodi nahato tajarojine jerani. Dio iadsa huati huana tadsa ia acco tocamabaqquijarijinena imadinissa tajaropaji. <sup>13-14</sup>Occa ima teppe tiadenidsa dsodo onajaropi ima najo tani-cca dsodo dsodo onejerani. Ima najora tanicadsa dsodo dsodo onajaro. Aji occa ima teppe timittamananissa tanijine jipa onaraha jidapana motara timittamanajaro. Nidsa dsotodena timittamananissa tanitohui. Nidsa ia Medsede

Jesocristo ccanipomahicca huada bacco tadsa tiadenipi iadsa tetidsemananitohui. Pina jidapana ia tiadenidsa etidsejarossa tiquinanitohui.

<sup>15</sup>Iadsa tetidsemananijine nahato onadsapi tahide tiadeni qquide occapona, onade. Nema onadsa tiadeni qquide occani pamadsapi ima bicani naqui tiadenidsa onanani pamanijine. <sup>16</sup>Obodi huatodsapi ajima onade: Dsama Masedonia-huaji occadsapi nani tiadenidsa onajoccana. Dsotodena Masedonia-huaji occa, omadi, occanipomadsapi tiadenidsa onajopomaccanijine, onajarode. Dsotode occa benehijine ohua acco ticamamanadsapi dsama Jodeahuaji occaninijine, onade.

<sup>17</sup>Naraha tiadeni qquide occapomajeradsa joma onadsapi ohuadsa: –A ¿Pablopa bodi huatohuissa tajararico? –tiquinejeraji. Ohuapi pajissa tiadeni qquide tohuini onadsapi occana, onade. Aja madija ohuahapa: –Jehe, ajima onanana –naraha huada onihidsapi: –Poni, nema onejerana –nahi caji tahi. Tettideni ohuadsa: –¿Pablopa nama najarico? –tiquinarana. <sup>18</sup>Naraha ohuapi nema onejerani. Diopa occa ima nahato tajari: Ohuapi maidsera onani. Pina Dio maidsera tajari-ssa onajaro. Ohuapi jehe onanitide, poni onanitide onejerani. <sup>19</sup>Aji ohua, Silvano, Timoteo inadsa Dio Bedi Jesocristo tahimari tiadeni mari icanabaquidsa ettipi: –Jesocristo-cca imapi pajissa nitide, pajissa jeranitide –inejerade. –Pohua tahimari nemanehipi pajissa –inajaro. –Pohuapa pohua attissa inanaridsajaro –ihinanajarode. <sup>20</sup>Jehe, Jesocristo pohuapa Imehi Dio

huati tapojarissa inanajaro. Nema nadsapi Jesocristodsa iquejenajaro-jine Abi Diodsa etidsedsa ettipi: –Pajissa nema nana –ihinanajaro. <sup>21</sup>Nadsama Dio Pohujinena Jesocristodsa iqueriqquinijine icca jeheniji, ticcadeni naqui todacorani najaro. Pohuapa ia tocattejid-sabaquijari. <sup>22</sup>Nadsapi Pohua pocca iquejenani ahuaato tanijinepi pocca nanajanodsa ia najanoridsajarissa najaro. Najaria aja Pohua Corime ibodidsa inanajari paja. Pohua Corime icajidsapi nidsa dsotode Pohua huati tapojaricca icajinijine nahatoquiri inajaro.

<sup>23</sup>Ohuemecotedeni, omaidsajerani. Diopa obodi nahato tajari. Tiadenidsa pajissehera huati onejeradsapi Dio ohua najidsohui bica tani, onajaro. Aji tiadeni qquide Corintohuaji occapomajeraropi tiadenidsa ohuati huana tadsa. Ohuatti oji ticanamananijine jipera onajarode. <sup>24</sup>Tiadenidsa naqui: –Ajima tiquinaji –inanijine tohuini inejerani. Jesocristodsa jehe tiquinanissa tani nahatoquiri inajaro. Tetidsemananijinena tiadeni acco camade tohuini inajaro.

**2** <sup>1</sup>Jehe, tiadeni oji onanabaquini- nijine jipera onadsapi: ¡Epeje! Tiadenihuaji occapoma-geraccana, onajarode. <sup>2</sup>Ojine oji oji tiquinadsapi ¿nejecojaridenina ohua inahatidsemanapadseje? Nohuerahitohui. Tijinedenina ohohuatidse najaro. <sup>3</sup>Najarojine tiadenidsa occa ima teppe dosse onajarode. Nani oqquejerana onajaropi tijinedeni oji onanijine jipera onadsa. Tijinedeni ohuatidsenijninena bica tani. Nahato onani: ohuatidsedsapi tiadeni naqui tetidsemananitohui. <sup>4</sup>Naraha occa

ima teppe dsodode ojadsa titohuideni obodi huatoto canadsapi: ¿Nejecoma quinahi? ohonanade. Obodi ocassera tadsa oji onade. Naraha occa ima teppe tiadenidsa dsodo onajaropi oji tiquinanijine jerani. Titohuideni ohuati huana tani nahatoqquiri tiquinanijinena dsodo onajarode.

–**Ima tonanajaricca imadsa: “Epeje, eti ajimani” tiquinana –najari Pablo**

<sup>5</sup>Nadsama titiqueriquimana nanicca ojariapa ohua oji tonanajaride. Ohuaha oji onani ojarijerani. Tiadeni naqui pohuajine oji tiquinade. Naraha najaro ojiepi imeni jerani. Ojine ima denima tojanijine jipera onani. <sup>6</sup>Aja tiadeni mota pocca imajine huati ticanaqquimanajaripa epejena. Nanidsa jicana, onajaro. <sup>7</sup>Jidapapi pocca imadsa: –Epeje, eti ajimani –tiquinana. Nadsapa pohua bodi acco ticamamanajo, onajaro. Bodi ocassera tadsa madi-jararana. <sup>8</sup>Nadsapi ohuatti bica tadsa tiadenidsa huati onana, ohuattissa tinanamananijine. Pahuadsa tetideni huanacquiri nani ahuato tinanamanapomana, onajaro. <sup>9</sup>Najaro imatohui tahide tiadenidsa dsodo onapjarode ¿Ohuattidsa iboraqquiri naco? onadsa. Nahato onanijine tiadeni nattome onabaqquide. <sup>10</sup>Jehe, nadsapi najaricca imadsa, madija ohuahacca imadsa naqui: –Epeje, eti ajimani –tiquinadsapi ohua naqui poccadeni imadsa: –Epeje, ohuati ajimani –onajaro. Imecote ima cajidsapa nema onanitohui. Cristo obodi nahato tajari: nema onajaropi

tiadenidsa ima ocassera tejeranijine. <sup>11</sup>Nema inadsapi Diocca huadi \*Satana iadsa deni toja-jarahitohui. Pocca ima nahatoqquiri inani: ia tonehedima-baqquihijine najorajari.

**Pablopa Troadehuaji madi-dsanapohuijine jipera tajari**

<sup>12</sup>Jehe, nadsama Jesocristo tahimari icassiejeranijinecca maride odsa panani Troadehuaji bacco onadsapi nahihuaicca madimanagerideni mari ocanabaqquihijine ia Medsedejine tohuabanissa tajarode. <sup>13</sup>Naraha nanidsa imecote Tito bacco onajaradsapa pohuatohui obodi huatoto canajaroline omadinissa tejerade. Nema onadsapi ohuemecotedenidsa: –Masedoniahuaji occaccana –onadsa nanihuaji occajarode.

**Pablopa Diodsa: –Epejeni, tijine bica tani –najari**

<sup>14</sup>Jehe, ima onihi, onihi caji taraha nema nehe Diodsa: –Epejeni, tijine bica tani –ihidsanapo nana, onajaro. Pohuajine Jesocristocca deni tojehedsa iquejenadsapi deni iquejenajaro. Pohuajine Jesocristo tahimari icassiejeranijinecca ecomerairidsadsapi dsama huapimadsa tojaridsajaro. Pina majo bicabote tojaribaqquijarissa najaro. <sup>15</sup>Iapi pina majo bicabote Cristo Diodsa da inajarissa inajaro. Pohua tahimaridsa idsepe ijjaropi Diodsa bica tajaro. Idsepe ijiridsajaroline tocassiejerahijinedenidsa, tocassiejera-jarahijinedenidsa bacco inaridsajaro. Pina majo bicabote toccabaqquidsa madijadsa bacco

taridsajarissa inajaro. <sup>16</sup> Jesocristo tahimari tocassiejera-jarahijinedenidsapi pina majo tabaccora tajarissa najaro. Najari majopa dsoqqehejinecca. Naraha tocassiejerahijinedenidsapi pina majo bicabotessa najaro. Najari majopa camittehecca. Jesocristo tahimaridsa pajissa quina-jarajaridenidsapi \*dsoqqehe jiquejeranicca tojanitohui. Pajissa quinajaridenidsa camittehe jiquejeranicca tojanitohui. Naraha ¿nejecojarina najaro ima inajari-baqquinijine maride pajirahi? <sup>17</sup> Aja Dio Atti mamarideni motapa manaconitohuira mari mari nanaridsamana naraha iapi nema inejerani. Jesocristodsa iquejenaropi pajissa Dio Pohua Atti ponira huati inanissa tanijine imadijaro. Ia Dossede Diopa ia qqui tabaqqijari.

### Diocca dosseniji dsati tahimarini

**3** <sup>1</sup> Etti nema inadsapi tiadenidsa pina: –Iana bicaquiri inajaro, deni iquejenani –¿inajarossa najaroqui? Tiadenidsa icca ima nema nanitide. Naraha iapi nema inejerani. Dio Atti maride ohuahadenipa tiadeni mari tocana-baqqui-manahijine tohuini quina-dsapa pohuadeni tahimari ima teppedsa dsodo nani nohue nohue quiquinanapojaro, –Jehe pocca-deni marinaja imittana –tiquinanijine. Naraha iapi nema inejerani. Etti naqui tiadenidsa: –Iadsa ima teppe dsodo tiquinaji, odsa panani onihihuaji madimanajaridenidsa nohue inanijine –inejerani. Ima teppe jirehe maride jaijaridsajaro. <sup>2</sup> Aji tiadenina icca ima teppessa tiquinajaro. Ticcadeni imapi

ibodidsa pina dsodo najarossa najaro. Aja odsa panani onihihuaji madimanajaridenipa ticcadeni ima nemanehe nahatoqqiri najari. Ticcadeni madie bica tani qqui toquinadsapa pohuadenidsa ahuato tajaro: tiadeni mari icanabaqquinijine Dio ia tocadossebaqqijari. <sup>3</sup> Jesocristojine ticcadeni madie bica tajaro huapima qqui toquinajari. Najaro ticcadeni imapi pina Cristojine dsodo nani nohue inaridsajarossa najaro. Naraha najaro dsodo nanipi dsodsodo ppajaniccadsa jerani. Pina sibadsa dsodo najarossa nejerani. Dio camitta tajari Corimejine tibodidenidsa dsodo inajarossa najaro.

<sup>4</sup> Jehe najaro imapi pajissa nahatoto inajaro. Jesocristocca iquejenarojine Diodsa pajissa inanijine ipajirajaro. <sup>5</sup> Naraha Diodsa idsepe ijiniijine ia motta ipajirani inejerani. Diona idsepe ijiniijine iadsa inanajaro. <sup>6</sup> Pohuajine inajoranissa tadsapi pocca \*jehe canireniji dsatidsa idsepe ijijaro. Najaropi pina Dio pocca dosseniji tahidecca Moisesidsa da inajarossa nejerani. Najaro dosseniji tahideccadsara madija madimanadsapa dsoqqehe jiquejeraniccadsa toquejenajari. Naraha Diocca jehe canireniji dsatidsa madimanajaridenipa dsoqqehe jiquejeraniccadsa toquejena-jarajari. Camittehe jiquejeranicca, madie dsati naqui Dio Corime pohuadenidsa da inaridsajaro.

<sup>7</sup> Diocca dosseniji tahideccapi Pohuajine bica tapojaro. Ssono tetepihuaji pocca deni tojehe, Pohua dsibehine ahuato inanadsa pocca dosseniji sibadsa dsodo inadsa Moisesidsa da inajaro. Najaro

ssonods Dio dsibehine dacora-dsapi Moisesi panods dsapa tajaro. Naraha Moisesi pano dsibehi taha qqedsippanidsapa Isaraeri potemahideni cappinamanajari. Pohuahujaji qqui naja cama-jarajari. Pohua pano dsibehine bica taraha tohuatora-ra amossi najaro. Jehe Diocca dosseniji tahideccapi bica tajaro. Dacorehema ccajonaraha madijapa najarodsara madimanadsapa dsoqqeue jiquejeranihuaji toquejenajari. <sup>8</sup>Aji Diocca dosseniji dsati Pohua Corimecca dacorehema ccajonajarona denima bica tajaro. <sup>9</sup>Najaro imapi pajissa: Diocca dosseniji tahidecca madijadsa dsoqqeue inanajaropi bica taraha pocca dosseniji dsati madijadsa camittehe inanajarona denima bica tajaro. Pocca dosseniji dsatidsa iquejenadsapi Dio icca ima Pohuadsa inapajiranissa tajaro. <sup>10</sup>Nadsama Diocca dosseniji tahideccapi biquehe cajiporaha pocca marinaja dsaticca biquehena denima bica tajaro. <sup>11</sup>Diocca dosseniji tahidecca bica taraha pina Moisesi pano dsibehine jicajarossa najaro. Naraha pocca dosseniji dsaticca biquehe deni tojajarona nema dsanaponitohui.

<sup>12</sup>Diocca dosseniji dsatipi bica tehe nema dsanaponitohui nahatoto inadsa najaro dosseniji ecomeridsanijine icappina-jerajaro.

<sup>13</sup>Najaro dosseniji dsatipi inajimajerani. Aja Moisesipa pohua pano dsibehine tohuatorani Isaraeri potemahideni qqui toquina-jarahijine pohua pano odsa najari quinahi nade. Naraha iapi pina Moisesissa inejerani. Diocca dosseniji dsati ecomeranipi ahuato tajaro.

<sup>14</sup>Naraha Isaraeri potemahideni

mittamanahijine huaribodeni sibaqquri najari. Pohuadenipa Diocca jehe canirenijicca dosseniji tahidecca hua hua quinaporaha huaribodeni sibaqquri najonamanajaria aja jidapana naco mittamana-jarajaripaja. Cristona ojarijari huaribodeni inassijabaqquids mittamanahijine. <sup>15</sup>Jehe jidapana naco Moisesijine dsodo nanicca hua quinadsapa mittamanahijine bodideni pajiramana-jarajari. <sup>16</sup>Naraha madija bodi cacajiquimeradsa ia Medsede Jesocristods pajissa nadsana mittahissa tahitohui. Pina pohua pano ohods idijarossa nadsapa qqui tahissa tahitohui. <sup>17</sup>Ia Medsede Pohua Corime naco pohuassa caniquimerajari. Pohua Corime iadsa madidsapa imasiridsa imadipojaropi jicani. <sup>18</sup>Najarojinea iapi pina Moisesi pohua pano odsa najarissa inejerajaro. Ia huapimapi pina pipirissa inadsa Diocca biquehe, pocca deni tojehe ahuato inanaridsajaropaji. Ia Medsedejine icca madie tobicadsanapojaro, pina pohuassa inanijine. Dio Corime iadsa madidsapa ia acco tocambaqquids sanapojari.

**Pablodenipa Jesocristo  
tahimari ponira mari  
mari quinajari**

**4** <sup>1</sup>Nadsama Diopa iadsa huati huana tadsa Pohuadsa idsepe ijinijine iadsa inanajaro. Najarojine ehetidse nadsapi: –Epeje, inebocquina –inejerani. <sup>2</sup> Icca marinaja pajiranissa tadsapi icappinijine nohuerani. Ahuatoranidsa ima inana-jerani. Maidsehe mari mari inejerani. Nema naniccapi ettajojaro. Icca mamari tabaqqi

icamajdsabaqqui-jarahi. Ijine Dio Atti tojidsa-gerani. Nohuerani. Diopa ia qqui tabaqquihi. Pajissara huati huati inajaro nahato tahi. Najarojinea madija huapima iadsa: –Maidseraqqiri nahi –quina-jari. <sup>3</sup>Aji Jesocristo tahimari icassiejeranijinecca ecomeraridsa-jaropi ahuato taraha madija mota tocassiejera-jarahijinedenidsapi ahuatora tajaro. Pohuadenidsa pina dsidsi tararossa najaro. <sup>4</sup>Najari-deni Jesodsa jehe quina-jarajaripa ajijaro dsamacca dodossedde \*Satana bodideni ecossabaqqui-dsanapojari. Nama quinadsapa Jesocristo tahimari icassiejeranijinecca bodidenidsa tossiaja-gerajaro. Cristo bicabote, ssiaja tahi, Imehi Diossa najari tahimari mari mari inajaro mittamana-jarajari. <sup>5</sup>Iapi icca ima ehecomera nejerani. Ia Medsede Jesocristo pohua tahimarina ehecomera najaro. Pohuadsa eti huanacquiri nadsa tiadeni acco icamabaqquinijine imadijaro. <sup>6</sup>Diopa dsama inahatopodsama huati tajari: –Dsidsinidsa ssiajani tossiajaridsana –napodsapa ssiajani tossiajabaqquijaro. Ibodidsa naqui Pohua ssiejene inanajaro, pocca biquehe, pocca deni tojehe nahatoqquri inanijine. Najaro pocca biquehe, pocca deni tojehepi Jesocristo pohuadsa ahuato tajaro.

**Ocasserani eraha Jesocristodsa  
jehe idsanapojaro**

<sup>7</sup>Diopa ajijaro ima bicani iadsa inanajaropi pina todsepetaji huatini ccara tanicca dsipa ssiqui nepi nanidsa hua idsajarossa najaro. Iapi pina dsipassa inajaro. Essirepi dsoqqequeque tanicca, dacorejerani.

Nema inadsapi madija huapimadsa ahuato tajaro: Diocca deni tojehe, pocca dacorehepi Pohua pocca. Icca gerani. <sup>8</sup>Nema nadsapi ima onihi, onihi iadsa ssonariraha iedima-gerani. Ima onihijine ibodi huatoto canaraha: –Cristodsa epeje inana –inejerani. <sup>9</sup>Ia tonajidso-baqquimanaraha Diopa ia nebo-jarajari. Ia tonajica-baqquimanahijine huahuacca iquejenaraha ia tonajica-baqquimanahijine pajiramana-jarajari. <sup>10-11</sup>Ahuaji jaija, ahuaji jaija naridsadsa najidsohue oppina tanicca inahanajaropi pina Cristo najidsohue inahanajaropi najaro inahanani huapima qqui toquinajari. Pohuadsa iquejenajarojine dsoqqeque iadsa huajira huajira naridsajaro. Nema inajaropi essire dsoqqequeque taniccadsa Jesocristocca madie ahuato inanajaro. <sup>12</sup>Nadsapi najidsohue iadsa ssonaridsa idsoqqequebote idsoqqequebote naridsaraha nema nehe idsepe ijijarojine tiadenipi camittehe ticajimananithohui.

<sup>13</sup>Aji Dio Atti dsodo nanidsapi ajima najaro: –Diodsa pajissa onajarojine pocca ima huati huati onajaro –napojari tamine Dabi. Najarossa inajaropi Diossa pajissa inadsa pocca marinajadsati ecomeraridsajaro. <sup>14</sup>Ibodidsa nahatoto inajaro: Dio ia Medsede Jeso inahatonijaripa ia Jesodsa jehe inajarodeni ia tonahatonibaqquihitohui. Dsotode naco tiadeni, ia, huapima Pohua madihihuaji ia tohuaccamacossanibaqquihitohui. <sup>15</sup>Aji ocasserani inahanajaro huapimapi ponima gerani. Tiadenidsa ima bicani tojanijinena inahanaridsajaro. Nadsapi

tiaidenidsa, madija ohuahadenidsa naqui Diocca tohuati huanehe tojaridsadsa madija huapi taha Diosda: –Jehe Abi Dio, tijine bica tani –quinahitohui. Pocca deni tojehe, pocca biquehe naqui qqui toquinahitohui.

<sup>16</sup>Najarojinea ehetidse nadsapi: –Epeje, ineboquina –inejerani. Iapi jadahi iquejenajonajaro. Essire tojapariraha ibodina huajijiradsa todacorani dsanapojaro. <sup>17</sup>Ajijaro namidsa ocasserani ejaropi badsira tani, jicaca tani. Naraha najarojine Diocca biquehe, pocca deni tojehe jicaquera tanicca denima denima iadsa tojadsanaponitohui. <sup>18</sup>Nadsapi inoccodsa qqui inajarocca, essire-dsa inahanajarocca tohuira ibodi huahuatomacca nejerani. Nema naniccapi jicanitohui. Naraha qqui inejeranicca, dsotode tojanijineccapi jiquejeranitohui. Najaro tohuira imadijaro.

#### Essire dsati icajinjinecca ima

**5** <sup>1</sup>Ajijaro namidsa imadidsapi essire jicaca taniccadsa imadijaro. Pina ajijaro namicca odsa icanahatojarossa inadsa imadijaro. Pina benehijinecca odsa jicaca taniccassa inajaro. Naraha nahatoqquiri inani: Icca odsa namicca tocatabaccoradsapi memehujina odsa dsati icajinitohui. Najaropi madijajine canahatojarossa nejerani. (Najaropi essire dsati jicaquera tanicca icajinjine Diojine iadsa najorapojarocca ima.) <sup>2</sup>Naraha ajijaro namicca essire jicaca taniccapi ocassera tajarojine ojiema imadijaro. Essire memehujiccana tohuini inajaro. <sup>3</sup>Najaro essire dsati icajinjinepi pina etero edsajarossa nanitohui.

Edsadsapi iccoroje jeranitohui. (Najaropi memehujaji icorime toccadsapi poni motta jerani, essire dsati cajinjinecca ima.) <sup>4</sup>Pajissa ajijaro namidsa imadiccadsapi essire jicaca taniccadsa imadijarojine oji oji idsanapojaro. Ocasserehepi iadsa ccanaja tajarossa najaro. Naraha essire jirehe imadinijine tohuini inejerani. Essire dsatina tohuini inajaro. Najaro icajidsapi jicaca tanicca inebonitohui. Camittehe jiquejeraniccadsana imadi-dsanaponitohui. <sup>5</sup>Najaro ima bicani nemaneha icajinjine Diopa ia tonanajora-baqui-jari. Pihuapa pajissa najarossa inananitohui nahatoqquiri inajaropi Pohua Corime iadsa da inaridsapojaropaji.

<sup>6</sup>Nema nadsapi ibodi icappina-geradsa Diojine etidsedsanapojaro. Nahatoqquiri inani: Essirema imadiccadsapi ia Medsede madihuaji huaji inaccani. <sup>7</sup>Aji memehujaji imadi-dsanaponijinecca iadsa najorajaro inoccodsa qqui inejercaraha ibodidsa nahato inadsapi pajissa inehe imadijaro. <sup>8</sup>Najaro-tohui etidsedsapi icappina-gerajaro. Ajijaro essire inebonijine tohuini inani, ia Medsedehuaji iccanijine. Ia Medsedehuaji imadi-dsanaponijninena iadsa denima bica tajaro. <sup>9</sup>Nadsapi essirema imadiccadsa ia Medsede inahatidse-dsanapohujine dissessera inajaro. Essire inebo-dsa memehujaji imadidsa naqui nema idsanaponitohui. <sup>10</sup>Nidsa dsotode Cristo pohua baccohujaji huapima idomo huadsapi icca ima cattedmade tojahitohui. Nadsana ia essirema imadidsa ima inanajarocca huapima Cristo nattome inanitohui. Ima bicani inanajaro manaconi,



tabaccorehe inanajaro manaconi  
naqui huapima iadsa inananitohui.

**Diopa icca imadsa  
tojonehijinecca marinaja**

<sup>11</sup>Dio noppine icappinanijinepi  
bica tani. Pohnadsa iboraqquiri  
inanijine naqui bica tani. Najaro  
nahatoto inadsapi madija huapima  
Pohnadsa jehe quinahijine disse-  
ssera inajaro. Diopa ohua, Timoteo  
tedseje ibodi qqui tahissa tahi.  
Maidseraquiri inani nahato tahi.  
Tiadeni naqui maidseraquiri  
inani nahatoquiri tiquinanijine  
tohuini inani. <sup>12</sup>—Icca ima bicani,  
pajiranissa tani —inajaropi ia  
ipamehe iadsa etidsenijine jerani.  
Tiadenina iadsa tetidsemana-  
nijinena tohuini inani. Icca ima  
nahatoquiri tiquinadsapi aja ia  
ajamani tonanabaquijari attideni-  
dsa tecomeramananijine tipajira-  
mananitohui. Najaridenipa: —Iana  
deni iquejenani, nahatoquiri inani  
—quinaraha madija panodenira  
qqui toquinajari. Madija bodideni-  
cca ima ssamoquiri najari.

<sup>13</sup>Nadsama madija attideni  
iadsa: —Bodideni tossamomana-  
jari —quinadsapa apaja, pohna-  
deni nama quinana. Aji idsepe  
ijijaropi Diona deni tojahijine.  
Madija ohuaha attideni naco  
iadsa: —Nahatoto tahi —quina-  
dsapa tiadenidsa naqui bica tani.  
<sup>14</sup>Cristopa itohui dsoqqejari,  
ia naqui pina pohna dsoqqe-  
jarissa inajaro. Najaro nahato-  
qquri inadsapi Cristocca tohuati  
huanehepi ia dosse dosse najarossa  
najaro. Najarodsas idsepe ijijona-  
jaro ajijaropaji. <sup>15</sup>Cristopa huapima  
itohui dsoqqejari. Nadsapa

pohnajine madie dsati cajimanajari-  
denipa pohnadeni tohuini quinahi-  
cca tohui madimana-jarahi. Cristo  
pohna tohuini nahicca tohuira  
madimanajari. Pohnapa pohnadeni-  
tohui dsoqqe, nahatoni najari.

<sup>16</sup>Jidapapi Cristocca tohuati  
huanehe nahatoto inadsapi madija-  
denicca ima ajijaro namicca deni  
tojedheda nattome inejerajaro.  
Tahide Cristodsas ssamoquiri  
inaccadsapi pohnadsa nema inade.  
—Pohnapa Dio Bedi, deni tojahi  
—inejerade. Naraha jidapapi pohna-  
dsa nema inejerani. <sup>17</sup>Nadsama  
madija Cristocca tojaripa Diojine  
dsati tojarari. Pocca madie naqui  
cacajiquimerajaro. Pocca imabote-  
dsa tojani-jarahi. Jidapapa madie  
dsati cajijari.

<sup>18</sup>Najaro madie dsatipi Dio-  
cca. Pohnapa iadsa huadi tapo-  
raha Cristo itohui dsoqqedsapa  
Pohna tedseje icajonerajaropaji.  
Dio iadsa huahua najaripa Pohna-  
dsa idsepe ijinijine, madija mari  
icanabaquidsa Pohna tedseje  
cajonerara canahijine. <sup>19</sup>Cristo  
ahua porimacossanidsa dsoqqe-  
jarijine Diopa madijacca imasiri  
manaconi pohnadenidsa inana-  
jerani. —Ticcadeni imasiri ohuati  
ajimani —najari. Nama nadsapa  
pohnadeni tedseje cajonerara cana-  
jari. Najaro ima bicani ecomera-  
ridsanijine ia tocadossebaquijari.  
<sup>20</sup>Nadsama iapi Cristo tahimari  
totohuacade iquejenani. Tiadeni-  
dsa huati inajaropi pina Dio tiadeni-  
dsa huati tajarissa najaro. Etti  
bica tadsa Cristo onima tiadenidsa  
huati huati inajaro: —Dio tedseje  
ticajonerara canaji —ihinanajaro.  
<sup>21</sup>Cristopa imasiri inana-jeraraha

icca imasirijinena Cristopa imasiri ponissa nadsa Diocca huadie pohuadsa ssonarijaro. Dio nama najaria ia Cristodsa ijariquijaro icca ima Pohuadsa pajiranissa tanijine.

**6**<sup>1</sup>Nadsama Diodsa idsepe ijijaropi tiadeni acco camade imadijaro. Nadsapi ettissa tinanamananijine etti bica tadsa tiadenidsa huati inajaro: Dio pocca tohuati huanehe tiadenidsa ahuato inanadsapi ponima tinanamana tejeraji, inajaro. <sup>2</sup>Aji Dio Atti dsodo nanidsapi Pohua Attia:

–Jehe, tiadsa occa tohuati huanehe ahuato onananijinecca huada bacco tadsapi ohuadsa huahua tadsa omittanitohui.

Tia onassiajanijinecca huada bacco tadsapi tia acco ocamanitohui –nahi nade.

¡Pajissa! Jidapanana pocca tohuati huanehe ahuato inananijinecca huada bacco tani. ¡Jidapanana ia tonassiaja-baqquihicca huada bacco tajaro!

**Pabloa Diodsa dsepe ijidsa ocasserani ahuaridsajari**

<sup>3</sup>Diodsa idsepe ijidsapi icca madie bica tani madija qqui toquinahijine dissessera inajaro. Nema inejeradsapi Diocca dossehe idsepe ijijaro tossamorana. Madija attidenipa: –A, pohuadenijine bica tejerani –quina-jarahijine imadinissa tajaro. <sup>4</sup>Dio ia tocadossebaqquijaridsa idsepe ijijaropi madija huapimadsa ahuato tanijine jipapa inajaro. Nema nadsapi ima onihi onihi iadsa ssonariraha mohuara-dsa inahanajaro. Imadinijinecca icappiradsa naqui mohuaradsa

icappirehe imadijaro. Ima ocassera tanicca naqui nema nehe mohuara-dsa inahanajaro. <sup>5</sup>Cocossirideni inahana, toponi cocorodsa ia hua todsimabaqquidsa inahana, mohuaniji tojaridsadsa iadsa ssonarimanahi inahana, tarabaidsa najo taniccadsa idsepe ijiridsani inahana, dsome inocco bissani inahana, pemi naqui inahana naridsajaro. <sup>6</sup>Pajissa Dio ia tocadossebaqquijaridsa idsepe ijijaro ahuato tanijinepi imasiri jirehe imadijaro, Diocca pajissehe nahatoto inajaro, ima najo tanicca inahananijine nahatoto inajaro, huapimadsa joneqquri inajaro, Dio Corime iadsa madijari, maidserehema madija huapimadsa eti huana tajaro. <sup>7</sup>Diocca ima bicani pajissara mari mari inajaro. Pocca dacorehe icajini iadsa ahuato tajaro. Icca ima Diodsa pajiranissa tajaropi pina jadsirejine icajjarossa najaro. Ia huadidedenidsa issonarinijine icaji, iadsa ssonarimanadsa naqui ibiquera-jeranijine icaji najaro. <sup>8</sup>Huada onihidsapa madija iadsa bicaqquri najari. Iadsa: –Ajajari-denipa bicaqquri nahi –quinajari. Naraha huada onihidsapa madija ohuaha iadsa jiperaqquri najari. Iadsa: –Ajajaridenipa tabaccoraqquri nahi –quinajari. Pajissa huati huati inajaroraha iadsa pina maidsaqquri najaridenidsassa quinajari. <sup>9</sup>Iadsa nahatoqquri naraha pina iadsa noccodeni jidsaqquri najaridenidsassa quinajari. Ecotabote naridsaraha camittaqquri inaccani. Ia tonajidsobaqqui-manaraha ia nanadsoque-manaraha. <sup>10</sup>Pina oji inajarossa naraha nema nehe Diodsa etidsejaro. Pina icappirajarossa naraha Diocca daniji

ima bicani icajijaro. Ijine naqui Diocca daniji madija huapimadsa tojaridsajaro.

<sup>11</sup>Jehe ohuemecotedeni Corintocca, imaisda-jeradsa ima mota naqui ecoma-jeradsa tiadenidsa huati huati inade. Ibodidsa icajijaro tiadenidsa inahabajarossa najaro. <sup>12</sup>Iapi tiadenidsa eti huanaququiri naraha tiadenina iadsa tetideni huaneraququiri najarossa tiquinajaro. <sup>13</sup>Nema nadsapi tiadenidsa pina occa ejedenidsa huati onajarossa najaro: Ohuadsa tetideni huanaququiri naji. Pina tiadenidsa ohuati huana tajarossa tiquinana, onajaro.

**Essirepi Dio camitta  
tajaricca mamadi**

<sup>14</sup>Jehe, tiadenidsa ohuati naqui: Jesocristodsa jehe quina-jarajaridenidsa tiquejemamana tejeraji. Aji ima bicanipi imasiri tadsajani quejemanijine ssamo tani. Pina ssiajani dsidsini tadsajani quejemanijine ssamo tajarossa najaro. <sup>15</sup>Najarossa najaro Jesocristo naco pocca huadi Satana tedseje cajonerahijine ssamo tahi. Jesocristodsa jehe najari naco aja Jesocristodsa jehe najarajari tedseje jehe canirehissa tahijine ssamo tahi. <sup>16</sup>Ia Diodsa jehe inajaro essirepi Dio camitta tajaricca mamadi iquejenajaro. Nema inadsapi madijacca dio pahuama-cadsa iquejenanijine ssamo tani. Ajana Dio Pohua Attipa:

– Ohuapi pahuadenidsa omadinitohui;  
pahuadenidsa naqui occuridsa-nitohui.  
Ohuapi pahuadeni Cacahuade Dio ojanitohui

Pohuadeni naco occa madija toquejenahitohui  
– napohui nade.

<sup>17</sup>Nama nadsapa Pohua Atti dsodonani onihi naqui:

– Ohuadsa jehe quina-jarajaridenidsa huajiji tinaji.

Oppina tahicca, jipera onaniccadsa damamana tiquinejeraji.

Nema tiquinadsapi tiadenidsa: “Jehe, Ohuadsa jai tijajonaji” onanitohui.

<sup>18</sup>Ohuapi ticcadeni Abi ojanitohui.

Tiadeni naqui occa ejedeni tiquejenanitohui  
– nahi nade ia Medsede Dio Dacorabote.

**7** <sup>1</sup>Ohuemecotedeni, tiadenidsa ohuati huana tani. Dio pocca madijadsa huati tapojaricca jidapana aji iadsa bacco najaropaji. Nema nadsapi ibodi huire tehe imadina. Essire inatabaccora-jeranijine ia ecahuana. Pina issicari-jeranijine obanidsa icarihuajajarossa inana. Dio noppine icappinadsa imadinissa dsanapona. Ibodi huire, ssiaja tehe imadi-dsanapojine Pohuadsara dissessera inana.

**Corintohuaji madimanajari  
bodideni cacajiquimeradsapa  
Pablo huatidsejari**

<sup>2</sup>Tiadenidsa huati omanipomana: ¡Iadsa jipaququiri tiquinapomaji! onajaro. Nadsa tiadenidsa icca ima pajiranissa tade. Tiadeni inajidso-baqqui-gerade. Maidseheda naqui tiadeni icamaidsabaqqui-gerade. Nohuerade. <sup>3</sup>Nema onajaropiticcadeni ima bica tejerani, onejerani. Pina tahide tiadenidsa huati

onajarossa najaro huati omani-pomajaro: Titohuideni ohuati huana tajaro. Najaropi omadidsa, odsoqquedsa naqui tiadenidsa ohuati huana tajaropi nema dsanaponitohui. <sup>4</sup>Tiadenipi ima tinapajiramananissa tajaro nahato onani. Ticcadeni ima bica tajarojine ohuatidsejaro. Ocasserani eraha nema nehe obodi bica tadsa ohuatidseni.

<sup>5</sup>Dsama Masedoniahuaji bacco inadsapi jassi inejerade. Ima ocassera tanicca jiquejerade. Ahuaji ima, ahuaji ima naridsadsapi ibodi naqui icappinajarode. <sup>6</sup>Naraha Diopa madija bodi ocassera tadsa huatidse-jarajari nahatidsede pajirajari. Puhuapa ia tonahatidse-baqquijaride, aja imecote Tito bacco najonadsa. <sup>7</sup>Tito qqui inadsa pocca ima imittadsapi etidsede. Pohua attipa: –Corintocca imecotedenijine ohuatidsede –najari. Pohua attinaco: –Pablo, tia qquide tohuini quinajari. Tiadsa ima ssonarijarojine titohui oji oji quiquinanajari. Tiadsa huatideni huanaqquiri nadsapa titohui disseraqqquiri najari –nadsapa pohuajine denima ohuatidsejarode.

<sup>8</sup>Occa ima teppe tiadenidsa dsodo onajaro qqui tiquinadsa oji tiquinani omittadsapi: Jaho ojine bica tejerajaro, onapode. Naraha jidapana nema onejerani. Aji oji tiquinajaropi badsira tani, huada huapi tejerade. <sup>9</sup>Jidapapi tijinedeni ohuatidseni. Aji oji tiquinarojine jerani. Tibodideni cacajiquimeradsa Diodsa tiquejenani-pomajarojinena ohuatidsejaro. Ticcadeni ojje ocassera taraha nema nehe tinahanamanajaropi Diodsa bica

tani. Nema nadsapi occa ima teppe tiadeni tonajidsobaqqui-jerani nahato onani. <sup>10</sup>Jehe oji tiquinarojine tibodideni cacajiquimeradsa Diodsa tiquejenani-pomajaropi Diodsa bica tajaro. Najaro ojiedsapi: –Jaho ojiepi tabaccora tani –tiquinejeraji. Najaro ojiejinenena ticassiejeranitohui. Naraha ajjaro namicca imadsa disseraqqquiri najarideni oji oji quinaraha dsoqqueமானadsapa \*najidsohue jiquejeranihuaji toquejenahitohui. <sup>11</sup>Aji ojje tinahanamanajaropi Dio jipa tahicassa tinanamanajaro. ¡Ajina, qqui! Tijinedeni ima bicani tojajaro. Ima tonanajari tiadenidsa qquedsima-jarahijine teccocco-manajaro. Ticcadeni ima tobicanijine tohuini tiquinajaro. Ima tonanajaricca imadsa tedimanajaro. Pocca imajine najidsohue tiadenidsa ssonarini noppineni ticappinamanajaro. Ohua qqui tiquinapomanijine, ohuadsa ima jicanijine naqui tohuini tiquinajaro. Ima tonanajari pocca ima manaconi tonahana-hijine naqui tohuini tiquinajaro. Nema tiquinadsapi ohuadsa ahuato tinanamanajaro: Ima tonanajaricca imadsa tiquejemamana-jerajaro. <sup>12</sup>Nema nanipi tiadenidsa occa ima dsodo onapojaropi ima tonanajari tinajidsomanahijine dsodo onani ojari-jerade. Puhuajine imecotedsa ima ssonarijaro acco ocamahijine naqui dsodo onani ojari-jerade. Aji tiadenidsa pajissa itohui tibodideni huaton paji naccani tiadenidsa ahuato tanijinenena dsodo onajarode. Itohui tetideni ajimamana-jerani Dio nahato tajari. <sup>13</sup>Najarojinena ibodi tobicajaro. Icca ojje eti ajimadsapi etidsejaro.

Ima onihi naqui Tito ticatidsemanahi imittadsapi denima etidsejaro. Ticcadeni ima pohuadsa bica tajaro. <sup>14</sup>Nadsama Titodsa ticcadeni ima huati onapode. Ohuattipi pohuadsa: –Corintocca Jesocristodsa jehe quinajaridenicca ima bica tadsa ohuatidsejaro –onapode. Nadsapa Tito tiadenihuaji toccadsa pajissa ticcadeni ima bica tani qqui tadsapa ohuatti dsori tejerani qqui tajari. Pina tiadenidsa pajissara huati huati onajarossa najaro Titodsa naqui pajissa huati onajaro. <sup>15</sup>Nadsapa Tito pohua attidsa iboraquiri tiqinani pohua bodi huatomadsapa huatidsejari. Pohua noppine ticappinamanadsa naqui pohuadsa bicaquiri tiquinade. Najarojine Titopa tiadenidsa denima huati huana tajari. <sup>16</sup>Tijjideni pajiranissa tanijine tohuini tiqinani nahato onani. Najarojine tiadenidsa ohuatidsejaro.

**Accoraquiri najarideni  
cappiramanajaridenidsa  
da inaquimananijine**

**8** <sup>1</sup>Jehe ohuemecotedeni, jidapanana dsama Masedoniacca Jesocristodsa quequeriqquimana najaridenidsa Dio pocca biquehe, pocca tohuati huanehe inaridsajarocca ima tiadenidsa huati onana. <sup>2</sup>Nahihuajicca imecotedenipa ocasserani onihi onihi inahanamanaraha huatidsemaneri najari. Pohnadenipa cappiramanaha madimanaraha accoraquiri nadsapa pina sseqquiri najaridenissa quinajari. <sup>3</sup>Pajissa onoccodsa qqui onajarocca tiadenidsa huati onajaro. Pohnadenipa huatidsemaneri nadsa da inaquimanajaro.

Denima da quinanjine pajiramana-jararaha denima da quinapomajaro. Madija ohuaha pohuadenidsa: –Nema tiquinaji –quina-jararaha. Pohnadeni tohuini quinadsa: –Jari, nema inanana –quinajari. <sup>4</sup>Dsama Jodeahuajicca Diodsa toquejenajarideni acco icamabaquiqui-manahijine tohuini quinadsapa iadsa huatide disseraquiri najari. Attidenipa: –Icca da naqquinaja pohuadenidsa dosse inanijine jehe tiquinaji –quinade. <sup>5</sup>Nadsama iapi poccadeni da naqquinajacca ima nahatoto inaporaha denima ima bicani inanamananijinepi ssamomo inapojaro. Aja pohnadenipa Diodsa pohnadeni ccaccoramanajari. Iadsa naco pohnadeni ccaccoramanajari, ettidsa iboraquiri nahijine. Nama quinadsapa Dio Pohna jipa tahicca inanamananissa tajaro.

<sup>6</sup>Nadsama Masedoniacca Jesodsa jehe quinajarideni tahimarideni bica tadsapi Titodsa ajima inajaro: –Tito, Corintohuaji ticcanidsa poccadeni da naqquinaja tidipomaji –inade. Aja pohnapa tahide ticcadeni da naqquinaja idipode. Nadsapi najaro da naqquinaja bicabote jicanissa tanijine Tito dosse inanipomajari. <sup>7</sup>Tiadenipi ima bicani sseqquiri tiquinajaro. Diodsa jehe tiqinani dacorajaro. Dio Atti maride naqui nahatoquiri tiquinajaro. Diocca dosseniji timittamananissa tajaro. Timecotedeni accode naqui disseraquiri tiquinajaro. Ijine tohuati huanehe ticahatterajaroma timadimanajaro. Nema tiquinadsapi timecotedeni cappiramanajarideni acco camade naqui accoraquiri tiqinani bica tani, onajaro.

<sup>8</sup>Naraha ohuatti nema onajaropi tiadenidsa dosse dosse onejerani. Jesocristodsa quequeriquimana najari ohuahadenicca da naqquinaja tahimarini timittamananjine poccadeni ima dsodo onajaro. Aji poccadeni ima timittamanadsapi tiadeni naqui jipaqquri tiquinadsa da taqquimana-pomanijine, onajaro. Accoraqquri tiquinadsapi pajissa timecotedenidsa tetideni huanacquiri nani ahuato tinanamananitohui. <sup>9</sup>Tiadenipi ia Medsede Jesocristocca biquehe, pocca tohuati huanehe nahatoqquri tiquinani. Puhuapa memehuaji madidsa huapima cajijari. Cappirajaraha madihissa tapojari. Naraha titohuideni namihuaji ccaronadsapa pina cappirajarissa naha madijarjine tiadenipi ssequiri tiquinajaro.

<sup>10</sup>Aja huajano toccapjaridsa dsama onihicca Jesocristodsa quequeriquimana najaridenicca da naqquinaja nohuerapocadsa tiadenina tahide: –Imecotedeni acco icamabaquina –tiquinadsapi tetidsemanadsa najaro ima tinahatomanapjarode. Nadsama tiadenidsa ima bica tanijinepi obodi huatojarocca tiadenidsa dsodo onajaro. <sup>11</sup>Aji ticcadeni da naqquinajapi tinequeriquimananissa tana. Pina huajano toccapjaridsa tetidsemanadsa da taqquimanapjarossa tinanamanana jicanijine. Ssequiri najarideni, badsira tehe cajimanajarideni naco pohnuadeni cajimanahicca mota da quinana. <sup>12</sup>Madija cajidsa pajissa dade jipa tadsapa pocca danijidsa Dio jipa tajari. Madija cappiradsa da inejerasa oppinera tani. Diopa cappirajaridsa: –Da tinaji –najarajari.

<sup>13</sup>Najaro da naqquinajacca imapi timecotedenidsara da tiquinadsa tiadenipi ticappiramana nanijine jerani. Tiadeni ticappiramana-jeradsa timadimana, pohnuadeni naco cappiramana-jaradsa madimana nadsana bica tani. <sup>14</sup>Jidapana ticajimanadsa pohnuadeni acco ticamabaqqui-manahijine tipajiramana-cani. Nidsa dsotode tiadeni naqui ticappiramanadsa manaco tiadeni acco tocamabaqqui-manahitohui. Ahuaji nema, ahuaaji nema inaridsadsapi huapimadsa pajiranissa tanitohui. <sup>15</sup>Pina Isaraeri potemahi jodiideni tahimaridenissa najaro. Pohnuadeni tapari memehuajicca catojaridsajari inaccamanahi tahimari Dio Atti dsodo nanidsa ajima najaro: –Huemahi inaccamanajari pohnuadenidsa mota toja-jarahi. Badsira taha inaccamanajari naco dsori taja cama-jarahi –nani nade Dio Atti dsodo nanidsa.

**Tito pohnuadeni tessedeni pamaha tedseje da naqquinajatohui Corintohuaji jai tojahijine**

<sup>16</sup>Diodsa ohuatidseda: –Jehe Abi, tijine bica tani –onajaro. Diojine Tito bodipa pina obodissa nadsapa pohnuadeni tedseje titohuideni disessera inajaro. <sup>17</sup>Pohnuapa tahide tiadeni qquide tohuini napojari. Tiadenihuaji toccahijine pohnuadsa huati onadsapi amadsati: –Jehe, jipa onani –najari. Jidapana pohnuaji jipa tadsa toccajari.

<sup>18</sup>Aja Titodsa imecote Jesocristodsa jehe najari ohuaha naco tiadenihuaji dosse inajari. Pohnuapa Jesocristo tahimari icassiejeranijinecca maride nahato tajari. Jesocristodsa quequeriquimana nahicca onih

onihi naridsajarocca imecotedeni pohnadsa jipaquqiri najari. –Pohnuapa bica tajari, Dio Atti maride nahato tajari –quiquina-najari. <sup>19</sup>Najari imecoteapa iadsa toccahijine icattejidsa-manapojari. Aji huapimacca da naqquinaja Jerosarehuaji iaccadsapi ia acco tocama-baqquihijine. Najaro da naqquinaja imecotedenidsa da inadsapi Diodsa huatidsemanadsa: –Jehe Abi Dio, tijine bica tani –quinahijine. Imecotedeni acco camade jipaquqiri inajaro naqui ahuato tanijine. <sup>20</sup>Najaro da naqquinaja bicabote ididsapi iaccanissa tanijine tohuini inajaro. Inassamodsapi: –Tijinedeni bica tejerani –quinarana, inajaro. <sup>21</sup>Najarojine ticcadeni da naqquinaja iaccanissa tana, inajaro. Diodsa, imecotedeni huapimadsa naqui icca ima bica, pajiranissa tanijine tohuini inajaro.

<sup>22</sup>Pohnuadeni pamahadsa imecote Jesocristodsa jehe najari ohuaha toccahijine dosse onajari. Pohnua dsepe ijiridsahi onihi onihi qqui qqui odsanapodsapi pohnuapa madija acco camade jipa tahi nahato onani. Ticcadeni ima mittadsapa tiadenihuaji toccade jipa tajari. Pohnua atti naco: –Jehe imecotedeni Corintohuajiccapa pohnuadeni attissa inanamananitohui –najari.

<sup>23</sup>Nadsama Titodsa madija attideni: –¿Ajaripa nejeco madija? –quinadsapa huati tiquinana: –Pablo huatimade, tiadeni acco camade Pablo pohnua tedseje dsepedeni ijimanajari –tiquinana. Imecote pamahadsa naco: –¿Nejeco madijadeni? –quinadsapa ajima tiquinana: –Jesocristodsa

quequeriquimana najaridenicca dosseniji huedajonajari –tiquinana. Pohnuadenipa Jesocristojine poccadeni madie bica tadsa madimananajari. <sup>24</sup>Nema nadsapi nahi tiadenihuaji bacco toquinadsapa Diocca tohuati huanehema pohnuadenidsa bicaquqiri tiquinana. Nema tiquinadsapi Jesocristodsa quequeriquimana najarideni Titodenidsa tetideni huanaquqiri nani nahatoquqiri nahijine. Aji etti naqui: –Corintohuajicca Jesocristodsa jehe quinaridenipa bicaquqiri nahi –inajaro huati huati inaridsapojaro naqui pajissa tojajaro nahatoquqiri nahijine.

**Jesocristodsa jehe  
quinajaridenidsa da  
naqquinaja tahimarini**

**9** <sup>1</sup>Nadsama Jerosarehuajicca Jesocristodsa jehe quinajarideni acco ticamabaquqimanahijine ticcadeni da naqquinaja tahimarini tiadenidsa huati onapode. Nadsapi ajijaro ima tepedsa: –Da tiquinaji –onapoma-gerani. <sup>2</sup>Pohnuadeni accode jipaquqiri tiquinani nahato onapojarojine dsama Masedoniahuaji occaridsadsapi titahimarideni huati huati ohonaridsa najarode. Ticcadeni ima bica tajarojine ohuatidsedsa pohnuadenidsa ajima onade: –Ohuemecotedeni dsama arobeni Acaiahuaji madimananaridenipa huajano toccapjaridsa imecotedeni Jerosarehuajicca acco icamabaquqimanahijine najoramanapode –onaridsajarode. Nadsapa imecotedeni Masedoniacca mota huapi taha ticcadeni ima bicani mittamanadsapa pohnuadeni naco: –Jehe ia naqui imecotedeni

Jerosarehuaicca acco icambaquina –quinajaride. <sup>3</sup>Tiadenipi dade jipaquiri tiquinani nahato onaraha tiadeni acco tocambaquimanahijine imecotedeni 3 quinaha tiadenihuaji dosse onabaquijari. Nema onajaropi da taquimananjine tinajoramannissa tanitohui. Nadsana titahimarideni huati huati onaridsapojaro pajissa tojadsapi etti maidsehe toja-geranitohui. <sup>4</sup>Nani tiadenihuaji occapomadsapi imecotedeni Masedoniacca naco ohuadsa jai tojahijine itide. Naraha ticcadeni da naquinaja tinajoramana-geradsa bacco inadsapi ¿nejecoma onapadseje? Ticcadeni imajine ohuatidseporaha ohuattissa tinanamana-geradsapi obodi ocappinanissa nanitohui. Tiadeni naqui da taquimanageradsapi ticappinamanannissa narana, onajaro. <sup>5</sup>Najaro noppineni ocappinadsapi tiadenidsa huatide Titodeni dosse onabaquipona, onajarode. Pohuadenipa tiadeni acco tocambaquimanahitohui, ticcadeni da naquinaja tinajoramannonijine. Aji tahide tettidenipi: –Jehe da inaquinatohui –tiquinapojaro tettidenissa tinamanana, onajaro. Nema tiquinadsapi accoraquiri tiquinani ahuato tanitohui. Naraha dade jiperaquiri tiquinadsa ticcadeni da naquinaja tinajorapogerasapi ticcadeni accohue ahuato tanitohui.

<sup>6</sup>Ajjaro imadsa tibodideni huatoma-manaji: Madijapa ppa nahi nocco badsira taha dappo inadsa bona badsira taha pore ina tahi. Huemahi dappo inadsa bona huemahi pore ina tahi. <sup>7</sup>Madija pohua tesse accode jipa tadsapa

bodi huatodsa: –Ajima nehe da onana –nadsa da inadsapi pocca ima Diodsa bica tani. Madija acco taraha da inadsapi pocca ima Diodsa bica tejerani. Madija dade jipera taraha madija ohuaha attijine da inadsa naqui pocca ima Diodsa bica tejerani. Dadecca ima Diodsa bica tajaropi madijapa bodi huatidseda da inadsana pohuadsa Dio huatidsejari. <sup>8</sup>Diopa tiadenidsa bica tanicca onihi onihi dade accora tajari. Ticappiramana-geranjine tiadenidsa huemani da inadsapi madija ohuahadeni acco ticambaquihijine tipajiramanitohui. Tiadeni naqui ima bicani onihi onihi tinanaridsamananjine Dio tiadeni tonapajirabaquihissa tahitohui. <sup>9</sup>Madija accora tajaricca imapi Dio Atti dsodo nanidsa ajima napojaro: –Cappiramanajaridenidsa dade accora tajari.

Ima bicani inanaridsajaropi nema dsanaponitohui –nani Dio Atti dsodo nanidsa. <sup>10</sup>Diopa ppa nahi nocco da inajari, ijipanjinecca naco da inajari. Najaro imassa najaropi ticappiramananica Dio tiadenidsa da inaridsanissa tanitohui. Denima tiadenidsa da inadsapi cappiramanajaridenidsa accoraquiri tiquinanitohui. Tijinedeni pina bono pore nahi huemajarissa nanitohui. <sup>11</sup>Nema tiquinadsapi Diocca daniji bica tanicca ssequiri tiquinanitohui. Madija ohuahadenidsa naqui dade accoraquiri tiquinanitohui. Nadsapi ticcadeni da naquinaja imecote cappiramanajaridenidsa dosse tiquinajaro dsojo inadsa pohuadenidsa da inadsapi pohuadenipa Diodsa



huatidsemanahitohui. <sup>12</sup>Nadsapi Jerosarecca imecotedeni ticca-deni da naqqinaja cajimanadsapa pohuadeni cappiramanahicca mitta quinadsa huatidsemanahitohui. Diodsa naco huatidsemanadsa: –Jehe Abi Dio, tijine bica tani –quinahitohui. <sup>13</sup>Imecotedeni acco ticamabaqqimanadsapa Jesocristo tahimari icassiejeranijineccadsa iboraqqiri tiquinajarojine ahuato tanijine. Aji pohuadenidsa, madija ohuahadenidsa naqui accoraqqiri tiquinadsapi Diodsa huatidsemanadsa: –Jehe Abi Dio, tiana deni tijani, bica tinani –quinahitohui. <sup>14</sup>Pohuadeni naco tiadenidsa huatideni huanacquiri nadsapa titohuideni Diodsa huati huati quinahitohui. Diopa tiadenidsa pocca tohuati huanehe, pocca biquehe inanararojine Pohuadsa: –Tijine bica tani –quinahitohui.

<sup>15</sup>Diocca daniji iadsa Pohua Bedi bicabote, deni tojjari. Etti denima bica tanicca huati inanijine ipajirajerani. Diodsa etidsedsa: –¡Jehe epejena! Ticca daniji iadsa bica tani –inana.

**Pablopa pajissa Jesocristocca dosseniji cajijari**

**10** <sup>1</sup>Ohua Pablo ohuatti bica tadsa tiadenidsa huati onana, ohuattissa tinanamananijine. Aja tiadeni mota ohuadsa ima ponimacca huati huati quinahi omittajaro. Attidenipa: –Pablo ibaccodsa huadsapa inoppine cappina tade. Naraha huaji tanidsa madidsapa pohua atti dacoranicca dsodode cappinera tajari –quinajari ttarana. Nadsapi pina Cristo jone tajari, bica tajari-ssa onadsa tiadenidsa huati onana:

<sup>2</sup>Ticcadeni ima ticattemamanapoji, onajaro. Nema tiquinadsapi nidsa tiadenihuaji occapomadsa tiadenidsa ohuadi-jeranitohui. Madija iadsa tatamasso quinajaridenidsa huatide ocappina-jerani. Aja attideni: –Pablodenipa pina ajijaro namicca imatohui disseraqqiri najaridenissa quinadsa pohuadeni tohuini quinahicca tohuira madimanajari –quiquinanaraha iapi nema inejerani. <sup>3</sup>Iapi pajissa ajijaro namicca madija iquejenani. Naraha aji icahadirejaropi pina ajijaro namicca madijacca jadsiressa nejerani. <sup>4</sup>ICca jadsirejinepi pina ajijaro namicca madijaccassa nejerani. ICca jadsirejinepi Diocca dacorehe icajijaro. Najarodsas imasiri tadsajani icahadirejaro. Imasiri dacoranicca pina siba sse nahuajanini dacorajarossa naraha Diocca dacorehejine barariridsehe jicajarossa nanitohui. Diocca dacorehedsa Jesocristodsas jiperaqqiri najaridenicca maidsehe inajicanissa tanitohui. <sup>5</sup>Madijadenicca deni tojehe naqui inajicanitohui. Madijapa Diocca pajissehe tocahatterahijineraha pohuadeni deni totonanadedeni ecossamanajaro. Poccadeni deni tojehe inajicadsapi pohuadeni bodicca huatohue Cristocca pajissehedsa nattome inahitohui. Nadsapi pohuadeni bodicca huatohue maidsehe tojani ahuato tanitohui. Bodideni cacajiquimeradsa Cristodsana tohuiboramanahijine, onajaro. <sup>6</sup>Tiadeni huapima Cristodsas iboraqqiri tiquinanissa tanijine imadiccani. Nidsa Cristodsas iboraqqiri tiquinanissa tadsapi aja motadeni Cristodsas ibobo tajaripa etti dacoradsa huati icanabaqquihijine inajorani. Pina inajidsobaqquijarissa nahitohui.

<sup>7</sup>Tiadenipi madija huapi qquidera ojarijaro. Madija bodicca ima ssamoqquri tiquinani. Aja madija attipa: –Ohuapi Jesocristocca dodosse ojararo –nadsapa pohua bodi huatona: Ia naqui pina pohua-ssa inajaro, Jesocristocca dodosse tabaqqui iquejenani. <sup>8</sup>Aji ohua motta ohuattipi: –Ia Medsede Jesocristopa ohuadsa pocca dossehe denima inanajaro –onanijine jipera onaraha nema onanijine ocappinajerani. Pajissa Jesocristocca dossehe ocajijaro. Najaro dossehe ohuadsa inanajaropi tiadeni mari ocana-baqquinissa tanijine, ticcadeni jeheniji todacorani nanijine. Ticcadeni jeheniji jicanijine jerani. <sup>9</sup>Occa ima teppepi pina tiadeni huajo tonana-baqquinijinessa naraha najaro tohuini onejerani. <sup>10</sup>Aja ohuadsa jiperaqquri najarideni attidenipa: –Pablocca marinaja pocca ima teppedsa dsodo inajaropi dacorani. Naraha pohua assire ibaccohuaji huadsapa atti japari tahi. Huatide ssamo tahi –quinajari. <sup>11</sup>Naraha attideni nama quinajari-denidsa: Paji, tibodideni huatomannissa taji, onajaro. Nidsa tiadenihuaji jaijadsa tibaccodenihuaji idomo huadsapi ohuatti dacoranitohui. Pina huaji tanidsa omadidsa occa ima teppe tiadenidsa dsodo onajarossa nanitohui.

<sup>12</sup>Madija ohuahadenipa poccadeni imadsara huatidsemanajari. –Iapi bicaqquri inani. Ijine bica tani –quiquinanaraha iapi nema inanijine icappinajaro. Pahuadenipa poccadeni imadsara pahuadeni nattome tanimanajari. Nama quinarajijine poccadeni imapi jidsa tajaro. <sup>13</sup>Iapi icca ima jerajarodsa: –Ijine bica tani –inejerani. Naraha Diodsa

idsepe ijiniijinepi Pohua ia tocadossebaqquijaridsana: –Ijine bica tani –inanijine oppinera tani. Pohua ia tocadossebaqquijarijine tiadenihuaji bacco inadsa tiadeni mari icana-baqquijarode. <sup>14</sup>Jehe, iana tahide tiadenihuaji Jesocristo tahimari icassiejeranijinecca tiadeni maride bacco inapode. Tiadenihuaji jaijapoderadsapi: –Corintohuaji ijine bica tani –inejeranitohuiraha. <sup>15</sup>Madija ohuaha dsepe ijjaridsa ettipi: –Ijine bica tani –inejerani. Pohua dsepe ijihihuaji idsepe ijjeradsapi icca ima jerani. Naraha tiadenidsana idsepe ijisanaponijine jipapa inani. Ticcadeni jeheniji napi dsanapodsapi denima tiadenidsa idsepe ijisanaponijine. <sup>16</sup>Timadimanani denihuaji Jesocristo tahimari icassiejeranijinecca maride jaijanijine naqui jipapa inani. Naraha mamaride ohuahadeni mari icana-baqqui-manapohuihuaji jaijanijinepi tohuini inejerani. Nanihuaji madija ohuahadenijine Dio Atti tojaporaha najarodsa: –Ijine bica tani –inejeranijine.

<sup>17</sup>Nema onajaropi Dio Atti dsodo nanidsa ajima napojaro: –Madijapa pohuajine bica tadsa: “Ojine bica tani” najarana. Pohua atti: “Diojine bica tani” nadsana pohua atti Ohuadsa bica tani –nahi nade Dio. <sup>18</sup>Madija pajissa bica tajaripa: –Ohuana bica onani –najarahi. Ia Medsede Diona pohuadsa: –Bica tinani –nadsapa pajissa iadsa, Diodsa naco bica tajari.

**Pablopa maidsehe  
mamaridedenidsa deni tojajari**

**11** <sup>1</sup>Ohuemecotedeni, ohuattipi tiadenidsa pina obodi tossamojarossa nanitide. Naraha

nema nehe ohuadsa tedimana-  
jeraji. Mohuaradsa ohuatti timitta-  
manaccaji, onajaro. <sup>2</sup>Ia Medseder  
tinajarimanahijine onadsa Djojine  
teconedeni huadi onajaro. Ohuapi  
pina dsohuatocca abissa onajaro.  
Tiadenipi pina dsohuatossa tiquina-  
jaro. Cristo tiadeni tocajibacqui-  
hijine pohuadsa huati onapjarode:  
– Corintohuaji quequeriquimana  
najaridenipa ticca toquejenana  
– onapode. Nema onajaropi pina  
dsohuato bica tajaro maquideje-  
dsa ssamo taccajarossa tiquinajaro  
Cristodsa tiadeni da onabaquini-  
jine tohuini onajaro. <sup>3</sup>Jesocristo-  
dsa jehe tiquinajaropi bica tade.  
Pohua ojarjaridsara disseraquiri  
tiquinade. Naraha madija ohuaha  
tiadeni tocamidsabaquih  
noppine ocappinani. Pina maitta-  
ccadsama macca maidsehe nahato-  
jide rabotepa Eba icamidsajarossa  
najaroa maidsehecca marinajadsa  
pajissa tiquinadsapi ticcadeni jehe-  
niji Cristodsa tojaparirana, onajaro.  
<sup>4</sup>Nema onajaropi tiadenidsa  
marinaja onihi bacco nadsa timitta-  
mananijine tohuini tiquinani. Aja  
Jeso tahimari onihi jidsa tajaro  
mari mari quinadsa mittade jipa-  
qquiri tiquinajaro. Tocorime ohuaha  
pina Dio Corimessa najararaha  
tiadenidsa tojahijine jehe tiquina-  
jaro. Madija tocassiejerahijine  
tahimari onihi naqui pina tahide  
timittamanapjarossa nejera-  
raha najarodsa pajissa tiquinajaro.  
<sup>5</sup>Najari maidsehe mamaride-  
denipa: – Iapi Jesocristocca dodosse  
tabaqqi iquejenani – quinaraha  
pohuadeni attidsa pohuadeni deni  
tonanamanajari. Naraha ohuapi  
pohuadenidsa ajimani ojajerani.

<sup>6</sup>Aji ohuapi ima huatide ssamo  
onajaro nitide. Naraha obodidsa  
nahato onani: marinaja pajissaccapi  
dsori onana-jerani. Najaro marinaja  
pajissacca nahato onajaropi occa  
marinaja, occa madiedsa naqui  
tiadenidsa ahuato onanadsanapo-  
jaro.

<sup>7</sup>Tiadenidsa omadidsapi Jeso-  
cristo tahimari icassiejeranijine-  
cca manaconi jirehe tiadeni mari  
ocanabaquide. (Nadsapa motadeni  
attipa: – A, marinaja manaconi  
jireheccapi ponima – quiquinana-  
jari. Naraha ohuapi occa tarabai-  
dsa onihiccadsana omadjarode.)  
Nema onadsapi ohua ajimani  
onanajarossa nadsa Diocca ima  
bicani ticassiejeranijinecca tiadeni-  
dsa tojanijinena odsepe ijjarode.  
¿Naraha nema onajaropi tiadenidsa  
bica tejerajari? <sup>8</sup>Dsama onihicca  
Jesocristodsa quequeriquimana  
najaridenicca dsiniro ohuadsa da  
quinajarodsa omadjarode. Najaro  
poccadeni da naqqinaja odijidsa-  
jarossa nadsa manaconi jirehe  
tiadeni maride odsepe ijjarode.  
<sup>9</sup>Tiadenihuaji omadidsa naqui  
ocappiradsapi: – Ohuadsa da  
tiquinaji – onejerade. Aja ohueme-  
cotedeni Masedoniacca bacco  
quinajaridenina ocappiranicca  
ohuadsa da quinajarode. Tiadeni-  
dsa occa madie najo tejeranijinepi  
ticcadeni dsinirotohui huati huati  
onejerade. Jidapana naqui najaro-  
ssa odsanaponitohui. Dsinirotohui  
huatira onani. <sup>10</sup>Aji manaconi jirehe  
tiadeni maride ojajarocca imapi  
ohuadsa bica tajaro. Najaro ima-  
dsa ohohuatidse najaro. Nadsapi  
dsama arobeni Acaia nemanehedsa  
occaridsanihuajicca madija occa

huatidsehe joma inanamananijine ssamo tani. Pina Jesocristocca pajissehe nahato onajarossa najaro occa huatidsehepi nema dsanaponoitohui nahato onajaro. <sup>11</sup> ¿Nejecotohui ohuatti nema onajaro?

¿Tiadenidsa jipera onajaroqui? Nohuerani. Diopa obodi nahato tahi: tiadenidsa jipa onani, titohuideni ohuati huana tajaro.

<sup>12</sup> Nema nehe manaconi jirehe tiadeni mari ocanabaquini jine onadsapi najarossa onanadsanaponoitohui. Nema onanadsapi maidsehe mamaridenicca ima joma onananoitohui. Attidenipa: –Ia naqui madija mari icanabaquijari pina Pablodenissa inajaro –quinaraha dsinirotohuira mari mari quinarari. <sup>13</sup> Pohnuadenipa Jesocristocca dodosse tabaqqi pajissacca attidenissa quinadsa tiadeni tocamaisdabaqqimanajari: –Jesocristo ia tocadossebaquijari –quinaraha maidsamanajari. <sup>14</sup> Naraha poccadeni maidsehedsa huajo inejerana. Maidsehe jinede \*Satana naco pohnu najidsadsa pina Diocca dodosse memehujicca ssiaja tajarissa nadsa madija icamaidsabaqqi tahi.

<sup>15</sup> Nama nadsapa Satanacca imadsa dsepedeni ijimanajarideni pohnuadeni najidsamanadsa pina bicaqqi najarissa quinadsa madija ihicamaidsabaqqi najari. Narahnidsa dsotodepa poccadeni tabacorehe manaconi pohnuadenidsa najidsohue tojanitohui.

**Pablopa Jesocristocca dodosse tojarijine ocasserehe onihini inahanajaro**

<sup>16</sup> Tiadenidsa huati onapomana. Ohuadsa: –Pablopa bodi

tossamojari –tiquinejerari. Naraha tibodideni nema tiquinadsapi epeje. Pina madija bodi tossamojarissa onadsa otahimari bica tajaro denima huati onadsa timittamanaji.

<sup>17</sup> Tiadenidsa otahimari huati onajaropi ia Medsede atti jerani. Ohua otahimarira huati huati onajaropi obodi tossamojarossa najaro nahato onani. <sup>18</sup> Mamarideni huapi taha tiadenidsa huati huati toquinadsa: –Ijine bica tani –quiquinanaraha pohnuadeni pohnuadeni tahimarira huati huati totoquina najari. Nadsapi ohua naqui otahimarira huati onana, onajaro. <sup>19</sup> Tiadenipi nahatojidede tijiraraha madija bodideni tossamomanajaridenicca marinaja mittade jipaqqi tiquinajaro. <sup>20</sup> Poccadeni marinaja mittade jipaqqi tiquinaraha poccadeni tabacorehe tinahanamanajaro. Pohnuadeni attissa tinanamananijine attideni dacoradsa tiadeni dosse dosse quiquinanaraha manaconi jirehe tidsepedeni ijimanajaro. Tidsepedenitaji, ticcadeni dsiniro inajicamanajaro. Tiadeni tocamaisdabaqqimanajari. Pohnuadeni deni tonanamanadsapa tiadeni ajamani tonanabaqqi-manajari. Tipanodeni huahuacca totonanabaqqimana najari. Naraha poccadeni tabacorehe tiadenidsa bica tanitide.

<sup>21</sup> Jaho ocappinajarossa naraha nema nehe huati onana: ¡lapi japariqqi inajaro! Tiadenidsa pina najaridenijinessa inanani jine ipajira-jerani. Pohnuadenipa: –Ijine bica tani –quinahijine dsiraqqi nadsapa ohua naqui otahimari huatide dsira onana. Pina madija bodi tossamojari huati huati

tajarissa onaraha nema nehe huati onana. <sup>22</sup>Ajana, pohuadeni attipa: –Iapi pajissa Isaraeri potemahi jodio madija iquejenani –quinaraha ohua naqui jodio. –Jodiodeni atti ebreo nahatoqquiri inani –quinaraha ohua naqui najaro \*tohuatti ebreopi ohuatti. –Icca idipa Abarahao –quinaraha ohua naqui pocca madija oiani. <sup>23</sup>–Iapi Jesocristocca dodosse tabaqqi iquejenani –quinaraha ohuana denima. Aji ohuana denima onajaropi pina madija bodi tossamojari huati huati tajarissa onajaro. Pohuadenipa Jesocristodsa dspedeni ijimanaraha ohuana denima. Toponi cocorodsa naco huedsamanaraha ohuana denima toponi cocorodsa ohuedseje naridsaponi najaro. Cocossi tonahanamanaraha ohuana denima cocossi onahanaridsajarode. Oppinehe onihi, onihijine odsoqqebote naridsade. <sup>24</sup>Jehe, ohuapi najidsohue onahanani huapi tade. Jodiodeni ohuadsa huadiqquiri najari attideni: –Pabloa tabaccora tahi –quiquinanadsa ohua cossi quinani <sup>39</sup> nehe onahanapojaro. Dsotode naqui ohua cossi quinani <sup>39</sup> nehe onahanapomade. Dsotode naco nama quinapomade. Huajano ohuahadsa nama, huajano ohuahadsa nama quinajaride. <sup>25</sup>Ahuadsa naqui ohua idamanani 3 nade. Sibadsa naqui ohua iquinaqqi-manani ojaride. Ocasserehe onihi onahanajaro naqui Jeso tahimari mari ocanaridsabaqqihijine canoa imenidsa benehi occadsapi canoa imeni je tocanade. Benehi onihi-dsa occapomadsa naqui canoa imeni je tocanapomade. Dsotode

occapomadsa naqui canoa imeni je tocanapomade. Ocasserehe onihi onahanajaropi coridsa imeni nocconidsa je ocanadsa otabodsapidsome, onassiaja, maji ohuaccapoma nade. <sup>26</sup>Benehi ojani huapi tadsapi oppina tanicca onahanani huapi tade. Hueni ssahaha dacorabote oppinani ohuajaro. Bobotidenijine oppinani ohuajaro. Occa madijadenijine oppinani ohuajaro. Madija ohuahadenijine naqui oppinani ohuajaro. Odsa panani-huaji naqui oppinani ohuaridsa nade. Odsa nohueranihuaji naqui oppinani ohuade. Coridsa imenidsa naqui oppinani ohuapomade. Jesodsa jehe quinaraha maidsamanajaridenijine ocasserani ohua-dsanapojarode. <sup>27</sup>Tarabaidsa imeni ocajidsa naqui onahanade. Tabaccora tanicca onihi, onihi ohuadsa bacco bacco dsanapojarode. Dsome ohuada-gerani naqui huapi tade. Pemi onahana, obacco dsarini onahana naridsade. Ssirini tojadsa naqui ocasserani ohuaridsa najarode. Occa etero ocajicadsa naqui ossirinissa tade.

<sup>28</sup>Jehe, ocasserehe huapi tehe onahanaridsaje naraha ima onihi-huaji naqui obodi huatoto caneje najaro. Aja Jesocristodsa quequeri-qqimana najari huapimadenitohu obodi huatoto cadsanapodsapi ¿nejecoma quinahi? ohodsanapo najaro. <sup>29</sup>Madija ojariacca jeheniji tojaparidsapa ohua naqui obodi tojaparijarossa najaro. Ohuahapa pohua tessejine imasiri inanadsapi ohuadijaro.

<sup>30</sup>Ohuapi ohua deni onananijine jipera onani. Naraha nema nehe ocasserani onahanaridsajarocca ima

huati huati onaccana, otahimari japari onanicca tiadenidsa ahuato taniijine. <sup>31</sup>Ia Medsede Jesocristo Imehi Diopa omaidsa-gerani nahato tajari. Pohuadsa etidsedsanapojine bica tani. <sup>32</sup>Aji ohuadsa ima ssonaripojaro tahimarini timittamanadsa japari onani nahatoqquiri tiquinanijine. Najaropi maittaccadsama odsa panani Damascosahuaji omadidsa poccadeni tamine deni tojahi Aretacca dosseniji dsama cacahuadepa ohua dama quananijine icadossebaqqujari. Pohuajine otohui odsa panani huapihuaji siba hua nahujaninica noccobiji huapima ecahuaridsa-mananissa tajarode. <sup>33</sup>Naraha otessedeni ohua acco icamamanade. Odsa panani siba sse nahujanini memehujicca noccobiji bedenihuaji ssaji cohuahidsa otessedeni ohua inajimamandasa ohua tappa icanaronamanade. Nadsapi todsepe ojanitohuiraha dsori onajarode.

**Dio Pablodsa ahuato inanajaro,  
Pablo comani inahanajaro**

**12** <sup>1</sup>Ohua motta otahimari-dsa: –Bica onani, deni ojani –onadsapi Dio ohuadsa: –Jehe, tettipi bica tani –¿nahijineco? Nohuerahi. Naraha nema nehe ohua Medsede ohuadsa ahuato inanajarocca, ohua tonahattajaricca ima naqui tiadenidsa ohuacomeranijine. <sup>2-3</sup>Maittaccadsama huajano jicahi 14 nadsapa Cristodsa jehe najari ojariapa Dio Corimejine pina pocca huadassa naraha pajissa qqui tajari. Dio Corime memehujai pohua iaccamacossadsapa Dio madihihuaji bacco tajari. Assire iaccamacossajari itide, corime itide, ssamo

onani. Naraha Diona nahato tajari. <sup>4</sup>Naraha pajissa nahato onajaropi memehujicca \*dsama bicanihuaji Dio Corime najari iaccamacossadsapa ima bicani cacomehecca mittajari. Mittaraha najaro ima madijadsa ecomeranijine Dio ecossanissa tajaro. <sup>5</sup>Ohuapi pocca ima nahato onajarodsa ohuati-dsenipi bica tajaro. Naraha ohua deni onanadsa ohuatidsenijinepi jipera onani. Ohuapi ajimani. Japari onajarodsana ohuatidsenijine jipa onajaro. <sup>6</sup>Naraha occa ima bicani huati huati onadsa naqui ponimacca jerani. Pajissara huati huati onanijineraha joma onajaro. Aji huati onani madija mittamandasa: –A, Pablopahatojide rajari –quinarana onadsa. Occa madiejine, ohuattijine madija ohua deni inanamananijine jipera onajaro. <sup>7</sup>Dio ohuadsa bica tanicca deni tojanicca ahuato inanajarodsana obodi: Jehe, deni ojani onanijineraha nema onejeranijine ocassera tanicca ohuadsa tojajaro. Najaro comanipi ohuassiredsa pina Satanajine atia coba idsanajarissa najaro. <sup>8</sup>Najaro comanijine ocasserani onahanadsanapojeranjine ohua Medsede Diodsa huati onajaro, huati onapomajaro, huati omanipomajaro naraha tomossijerani. <sup>9</sup>Naraha ohuadsa ohua Medsede attipa: –Tiadsa ohuati huana tajaro. Ocasserehe tinahananijine tia acco ocamanitohui. Occa dacorehepi madija japari tajari-dsana denima ahuato tani –nade ohuadsa. Pohua atti nama nadsapa japari onaraha ohuatidsejaro. Japari onadsa Cristopa ohuadsa pocca dacorehe ahuato inanajaro. <sup>10</sup>Jehe,

japari onadsa, ohua itamassomana-  
 dsa, ocappiradsa naqui ohuatidse-  
 jaro. Nanajidso ojadsa, najo tanicca  
 onahanadsa naqui Cristodsa dissera  
 onajarojine onahana-dsanapodsapi  
 ohuatidsejaro. Nema onajaropi  
 mijira onadsa obodina todacorani  
 najaro.

**Corintohuaji Jesocristodsa  
 quequeriquimana  
 najaridenitohui Pablo  
 bodi huatojari**

<sup>11</sup> Ohua motta occa imara huati  
 huati onadsapi pina madija bodi  
 tossamojarissa onaraha ohuadsa  
 tettideni joma tiquinadsa nema  
 onajaro. Tiadenina otahimari  
 tetecomeramana nanijine occa  
 ima nahatoqquri tiquinaraha.  
 Aja maidsehe mamaridedeni-  
 dsana disseraqquri tiquinajaro.  
 Najaridenipa ohua ajimani inana-  
 manaraha epeje, pina ponimacca-  
 ssa onajaro. Naraha pohuadeni-  
 dsa ajimani ojajerani. <sup>12</sup> Ohuapi  
 pajissa Jesocristo ohua cadossejari  
 tiadenidsa ahuato onanaridsa-  
 jaro. Aji Djotine ocanahatori  
 canajaro, aji qquri tiquinapo-jera-  
 jarocca naqui ahuato onanajaro.  
 Ocasserehe ohuadsa ssonaridsa  
 naqui mohuaradsa onahanani  
 ahuato tajaropaji. <sup>13</sup> Ima ojariena  
 ojine dsori tiquinajaro. Najaroa  
 tiadenidsa dsinirotohui huati  
 huati onejerade. Nema onadsapi  
 pina tiadeni ajimani onanabaqqi-  
 jarossa najaro. Aja Jesocristodsa  
 quequeriquimana najari ohuaha-  
 denidsapi dsinirotohui huati huati  
 onade. Naraha tiadenidsapi occa  
 madie najo tejeranijine nema  
 onejerade. Naraha ojine tiadenidsa

bica tejeradsapi: Epeje, ojine bica  
 tejerani, onajaro.

<sup>14</sup> Tahide tiadeni qquide occani  
 pamade. Jidapana tiadeni qquide  
 occapomanijine onajorani. Nani  
 tiadenihuaji bacco onapomadsa  
 naqui occa madie tiadenidsa najo  
 tejeranijine ohuadsa da tiquinaji  
 onejeranitohui. Ohuapi ticajimana-  
 nicca tohuini onejerani. Titohui-  
 denina onajaro. Ohuapi pina  
 ticcadeni abissa onajaro. Ejedeni-  
 pa imehideni cappiramanahicca mitta  
 mitta quina-jarahi. Imehidenina  
 bedideni cappiramanahicca mitta  
 mitta quinajari. <sup>15</sup> Nadsapi ohua  
 ocajijarocca nemanehi tiadenidsa  
 dade jipa onani. Tiadenidsa ima  
 bicani tojanijine ohuassire naqui  
 tiadenidsa ohuaccorajaro. Tiadeni-  
 dsa accora onaraha ticcadeni  
 ima ohuadsa jidsa tajaro. Ohuapi  
 titohuideni denima ohuati huana  
 dsanaporaha tiadenina ohuadsa  
 tetideni tohuanerajonajaro.

<sup>16</sup> Occa madie tiadenidsa najora  
 tanijine ticcadeni dsinirodsa omadi-  
 jerani nahatoqquri tiquinaraha  
 ohuadsa tiadeni mota attidenipa:  
 –Pablopa maidsade nahato tajari.  
 Ia tocamajidsabaqquihissa tajari  
 –quinajari. <sup>17</sup> Naraha ¿nejecora  
 tiadenidsa onanadsa tiadeni  
 ocamaidsabaqquijarotte? ¿Tiadeni-  
 huaji dosse onabaqquijari ojaría  
 ticcadeni dsinirotohui tiadeni  
 tocamajidsabaqquijari ttarana?  
 ¡Nohuerahi! <sup>18</sup> Aja huajano tocca-  
 pojariidsa Titona tiadeni qquide  
 toccahijine pohuadsa huati onadsa  
 toccade. Pohuadsa imecote ohuaha  
 naco dosse onajaride. ¿Naraha  
 Titopa dsinirotohui tiadenidsa  
 maidsajari ttarana? ¡Nohuerahi!

Pohuapa pina ohuassa najari. Pohua bodi tohuini nahiccapa pina ohua obodi tohuini onaniccassa najaro. Ohua, Tito tedsejepi Jesocristocca marinajassa inanadsa imadijaro. Najarossa icanirejaro.

<sup>19</sup>Aji icca ima huati huati onajaropi tiadenidsa: –Icca ima dsori tejerani, tossamo-gerani –inanijine jerani. Ia Jesocristocca dodosse iquejenajaropi tiadenidsa ima bicani tojanijinera huati huati inajaro. Dio etti mittahi nahatoqquri inajaro. Ohuemecotedeni, tiadenidsa ohuati huana tani. Idsepe ijie huapimapi Jesocristodsa jehe tiquinajaro todacorani nanijine. <sup>20</sup>Titohuideni obodi huatojaro: ¿Tiadeni qquide occapomadsapi ticcadeni ima nejecoma napadseje? ohonanajaro. Ticcadeni ima bica tadsa nani bacco onanijine tohuini onani. Tiadeni naqui ticcadeni imadsa ohuatidsenijine tohuini tiquinani. Naraha ticcadeni ima bica tejeranicca noppinenina ocappinajaro. Ticahadirere canadsa timadimananitide. Madija cajijaricca acconi tetedimana nanitide. Amadsati tedimanadsa ahuaui johua, ahuaui johua tiquinanitide. Accoqquri tiquinadsa timadimananitide. Najaro noppineni ocappinajaro. Titessedenidsa tatamasso tiquinanitide. Ponimacca ima huatijidede tijiranitide. –Ohuana deni ojani, bica onani –titiquina nanitide. Tiqueriquimanadsa ahuaui johua, ahuaui johua tiquinadsa ticcadeni ima tocanissa tejeranitide. Nema tinamanadsapi ohuatidse-geranitohui. Tiadeni naqui tiadeni huati ocanabaqquidsas ohuadsa tetidsemana-geranitohui.

<sup>21</sup>Jehe, nanihuaji bacco onani-pomadsapi ticcadeni imajine Dio tedsejema ocomehi nani noppineni ocappinajaro. ¿Ticcadeni imajine oji oji odsanapopadseje? onajaro. Aji tiadeni mota huapi taha tahide-dsama imasirima madimanajanajaria jidapana naco nebomana-jarahitide. Pohuadenipa tabaccorehe oppina tanicca tonanade disseraqquri naccahitide. Huananehe huapima ihinanaridsamana naccanitide. Ima tabaccora tanicca tonanade disseraqquri naccahitide, onadsa ocappinajaro.

**Pablocca ima nattome  
quinaraha pohuadenidsa:  
–Tiadeni tiadenira nattome  
tinanimanaji –najari**

**13** <sup>1</sup>Tahide tiadeni qquide occani pamade. Jidapana tiadeni qquide occapomanijine onajorani. Nani tiadenihuaji bacco onapomadsapi ticcadeni ima cattemade onajo-geranitohui. Tetideni ajimamana-geraji: Madija ima tonanadsapa pohuadeni noccodsa qqui toquinajarideni ima cacattemadedsa huati toquinahi bica tani. Madija pamaha, 3 quinaha naco huati toquinadsa pajirani. <sup>2</sup>Nadsapi tahide ima ticajimanapojarodeni, aji tiadeni huapimadsa naqui ohuatti timittamananissa taji, onajaro. Huajano toccapojaridsa tiadeni qquide occadsapi ticcadeni imasiri tinebomananijine tiadeni huati ocanabaqquide. Jidapana huaji tanidsa omadidsa naqui ohuatti nema onapomajaro: ¡Imasiri tinebomanaji! Tinebomana-geradsa bacco onapomadsapi ticcadeni imasiri mohuaradsa onahana-geranitohui.



Ohuatti dacoradsa tiadeni huati ocanabaquui-pomanitohui. <sup>3</sup>Nema onajaropi occa ima nattome tiquina-dsa: –¿Pabloa pajissa Cristo atti huati huati tajarico? –titiquina najaro. Naraha Jesocristopa dacorajari. Ticcadeni imasiri manaconi tiadeni tonajidso-baqquihijine japari tajarajari. Pocca dacorehe tiadenidsa ahuato inananitohui. <sup>4</sup>Pohuapa pina japari tajarissa nadsa ahua porimacossanidsa dsoqquejari. Naraha Dio pocca dacorehe pohuadsa inandsapi nahatonidsa camitta taha madijari. Ia naqui najarossa inajaro. Jesocristocca japarie icajiraha pocca iquejenadsapi Diocca dacorehe icajini. Najaro dacorehema tiadeni acco camade imadijaro.

<sup>5</sup>Tibodideni huatonissa taji. ¿Ticcadeni jeheniji dacoraqui? Jari, tiadeni nattome tinanimanaji. –¿Pajissa Jesocristo ohuadsa madico? –tiquinaji. Jesocristo tiadenidsa madi-jaradsapa ticcadeni jeheniji dsori taccani. <sup>6</sup>ICca ima nattome tiquinadsa naqui dsori inanani qqui tiquinejeranitohui. Pajissa Jesocristo iadsa madihi tiadenidsa ahuato tanijine nahato onajaro. <sup>7</sup>Diodsa huatide iquejenadsapi: –Abi Dio, imecotedeni Corintocca tabaccorehe inanamana-jeranijine bodideni acco ticamabaquina –ihinanajaro. Najaro icca huatinajapi icca marinaja tossamoni noppineni icappinadsa jerani. Pajissa ticcadeni madie pajiranissa tanijine tohuini inadsa Diodsa huati huati inajaro. Aji tiadeni mari icanabaquuijaro pina dsori tajarossa nanitide naraha epeje, nema nehe, inajaro. <sup>8</sup>Diocca pajissehdsa ima inananijine ipajira-jerani. Diocca pajissehema

timadimananijine tiadeni acco icamabaquuinijinena bica tani. <sup>9</sup>Nadsapi japariquiri inaraha etidsejaro. Jesocristodsa ticcadeni jeheniji todacorani nanijinena tohuini inajaro. Titohuideni Diodsa huati huati inajaropi ticcadeni ima Diodsa pajiranissa tanijine. <sup>10</sup>Najarojine aji timadimananihuaji occapoma-jeracadsa occa ima teppe tiadenidsa dsodo onajaro, nani bacco onejeracadsama ticcadeni ima ticattemamanaponijine. Nadsapi nani bacco onadsa ohuatti dacoradsa tiadeni huati ocanabaquui-jeranitohui. Ia Medsede pocca dossehe ohuadsa inanajaropi ticcadeni jeheniji todacorani nanijine. Ticcadeni jeheniji jicanijine jerani.

#### **Pablocca ima jicanicca**

<sup>11</sup>Jehe ohuemecotedeni Jesocristodsa jehe tiquinajaro, ajijaropi occa ima jicanicca. Diodsara tetetidsemana naji, onajaro. Ticcadeni ima ticattemamanaji, ticcadeni madie tobicanijine. Tibodideni acco acco ticanana. Timecotedeni tedseje jehe ticanireni-sa taji. Ticajonerara canadsa timadimananissa taji. Nema tiquinadsapi Dio tiadenidsa madihitohui. Diopa tohuati huanehe jinede, jonehe jinede.

<sup>12</sup>Nani timadimananihuaji timecotedeni tedseje bacco ticaniredsapi nija tiquinadsa dama, ticahuajacossa titiquina naji, onajaro. Aji omadinicca imecotedeni naco huapima tiadenidsa nija quinajari.

<sup>13</sup>Ia Medsede Jesocristopa tiadenidsa ima bicani inanana, onajaro. Diocca tohuati huanehe naqui tiadenidsa tojadsanapona. Pohua Corime tibodidenidsa madi-dsanapona, onajaro. Epejeni.